

18. maj 2017

Umiatsiaararsorlutik aalisartut saarullinnik bundgarninik pisarineqartunik pisarineqareerlutik aniseqqinneqartut annertussusaat pillugit nalunaaruteqartarnissaat, kiisalu nalunaarutigineqartut pinngortitaleriffimmut atugassanngortinneqarnissaat qulakkeerniarlugu Naalakkersuisut suliniuteqarnissamik peqquneqarnissaat pillugu Inatsisartut aalajngiiffissaattut siunnersuut.

(Inatsisartunut ilaasortaq Hans Aronsen, Inuit Ataqatigiit)

Nunatta sineriaa avannaa kitaa kujataa nunattalu kangiani kujasinnerusortaa avannarpasinnerusortaa ataatsimut isigissangaanni peqassuseq aalisakkat eqqarsaatingalugit sukumiisumik ilisimaneqanngilaq, tamatumunngalu tunngaviuvoq sumiiffiit aaliangersimasut kisimik annertunerusumik aalisarfiunerat.

Inuussutissarsiutit pingaarnersaat annertunerusumik atorluarneqassappat aalisarfiit siammarlugit qalluiffiunissaat pingaarutilerujussuuvoq, maannakkullu immap kiannerulerneratigut saarullik sulii avannarpariartorpoq annerusumillu atorluassagutsigit tunitsiviusinnaasut annertunerpaamik killilliipput.

Tunitsiviillu pioreersut ataavartumillu naatsersuutigineqarsinnaanngitsut siuarsaavigineqarnissaat saneqqunneqarsinnaanngilaq, taamaaliunngikkuttalu sinerissami sumiiffiit aaliangersimasut kisimik annertunerusumik qalluiffiunerat allanngorsinnaanngilaq.

Aalisarfiit peqarfiillu siamasinnerusut aalisakkanik qalluiffiussappata tunitsiviit puttasut pilertorerusumik atulernissaannut aporfiit piaarnerpaamik piiarneqartariaqartut Siumumiik isumaqarpugut, taamaattumillu qangaaniilli pisanik bundgarninit uterartittakkatta nalunaarsorneqartalernissaat aqutissaasorinnginnatsigu erseqqissassuarput.

Bundgarnersortarneq eqqarsaatingalugu sineriassuarput ataatsimut isigissagutsigu angallatersortoqtoq aamma ilisimavarput, taakkulu piutillugit qalunik qalluisarneq pinngittoorneqarsinnaa-

nngilaq, pisanilu nalunaarsuisarnerlu eqqartorneqassappat saarullinniat tamarmik pineqartariaqarput umiatsiaararsortut kisiisa nalunaarsuinnermut innersuunagit.

Kiisalu saarulleqassuseq annertunerusumik misissorneqassammat Pinngortitaleriffimmut aningaasaliissutit annertusiallatsinneqarput, taannalu uniffiginagu sarfap kissartup nunatta sineriaata qanittuaniinnerata nassatarisai atorluartariaqarput, ilisimareerparpummi qanoq saarulleqartigisoq.

Pisanik nalunaarsuisarnermut inatsiseqarpoq, allannguisoqassappallu inatsimmut allannguutissamik siunnersuuteqartoqartariaqarpoq, taamaattumik taamatut isikoqartillugu siunnersuut Siumumit itigartipparput.

Nikolaj Jeremiassen

Siumut